

Bersatu tangani isu akidah Islam
Utusan Online
November 06, 2011
Oleh NUR AZHARI ZAINOoddin

KUALA LUMPUR 5 Nov. - Umat Islam seharusnya mengetepikan segala ideologi, fahaman, kepentingan peribadi dan politik dalam mencapai penyatuan ummah serta berhadapan dengan isu berkaitan akidah Islam.

Ahli Parlimen Kulim-Bandar Baharu, Datuk Zulkifli Noordin berkata, umat Islam apabila berhadapan dengan isu berkaitan akidah Islam haruslah bersatu dalam menanganinya.

"Tuding-menuding tidak menyelesaikan masalah. Seperti isu hudud, apabila Perdana Menteri mengatakan ia tidak sesuai untuk dilaksanakan dengan keadaan semasa, banyak pihak yang memberikan tanggapan sehingga ada yang menyatakan kenyataan itu adalah kenyataan orang kafir.

"Namun apabila Menteri Besar Kedah memberikan alasan berkongsi kuasa dengan PKR dan DAP sehingga hudud tidak akan dilaksanakan di negeri itu, ia dapat pula diterima," katanya.

Beliau berkata demikian apabila menjawab persoalan yang diajukan semasa menjadi tetamu jempunan dalam rancangan Bicara Rakyat, malam tadi.

Tambahnya, apa yang sepatutnya dilakukan adalah bersatu ketika berhadapan dengan isu berkenaan.

Bagaimanapun Zulkifli menambah, penyatuan ummah tidak dapat dipisahkan daripada politik.

"Politik adakalanya menjadi masalah dalam penyatuan ummah ini. Ada ahli politik yang 10 tahun lalu bercakap lain tetapi hari ini lain," katanya.

Sementara itu, Exco Hal Ehwal Islam Negeri Selangor, Datuk Dr. Hasan Mohd. Ali menegaskan sekiranya umat Islam meletakkan akidah di barisan hadapan, banyak masalah dan isu yang dapat diselesaikan.

"Tidak hanya terikat dengan masalah akidah tetapi masalah lain yang berkaitan dengan ekonomi dan politik turut sama dapat diselesaikan.

"Seperti mana kita berdepan dengan isu program mempromosikan seks bebas Seksualiti Merdeka 2011, banyak pertubuhan bukan kerajaan (NGO) bersatu dan bangun menentang. Itu menunjukkan sesuatu yang baik dan NGO perlu memainkan peranan sedemikian," ujarnya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=1106&pub=Utusan_Malaysia&sec=Dalam_Negeri&pg=dn_06.htm